

Gagauzların XX üzyılın en büyük tragediyası için başkandan hem başkancıklardan bir çit ta çıkmadı: Bİ-ŞEY-CİK!

Canavar ayın (oktäbri) 19-da, Gagauziyada bakıldı “Aaçlık kurbannarını Anmak Günü”, ama kuvettä bulunannarın hem onnara sözdä opozitiya yapannarın aazından gagauzların XX üzyılın en büyük tragediyası için bir çit ta çıkmadı.

Hadi laf sölemää istämedilär, ama makar kendi yardımcılarına emir veräydilär onnara izmet edän saytlarda AAÇLIK İÇİN iki-üç acızzannık lafi yazsınnar: Bİ-ŞEY-CİK!

Bıldır da, öteeyıl da hep ölä oldu. Demeli, onnar bizdän diildir, çünkü halkın sancısını duymêrlar! Osa duymaa mı istämeerlär?

Var bir başka şüpä dä: acaba onnar o aaçlı yapannarın unukaları hem unuçekaları mı, onnarlan bir soydan mı, da büün dä mı gagauz halkına kin besleerlär? Nicä da olsa, geçmişi unudannarın geleceä yok. Toz gibi daalaceklar toprak üstündä.

*Akademik hem poet Todur ZANET,
Gagauz Milli Gimnanın avtoru*

Türkiyenin 98-ci yıldönümü kutluca olsun

Canavar ayın (oktäbri) 29-da Türkiye Respublikasının kurulmasının 98-ci yıldönümünü tamamnandı.

Türkiye Respublikasının kurulması dünneyä bildirildi 1923-cü yılın Canavar ayın (oktäbri) 29-da, ondan sora, nicä Türkiye Parlamenti (Türkiye Büyük Millet Meclisi) kabletti hem temelä koydu türk halkının Büyük öndercisinin Mustafa Kemal ATATÜRKün tarafından hazırlanan Türkiye Konstitütyasına bu uurda diişiklii.

Saalık uurunda Üstolan Durumu Kasımın 30-dan uzaltılar

Moldovanın Cümne saalunda Üstolan Durumu milli komisiyası (CSÜDK) Kararınnan Moldovada saalık tarafından uurunda Üstolan Durumu Kasım ayın (noyabri) 30-na kadar uzaltıldı.

Cannarı taştan olmayannar Aaçlık kurbannarını andılar



Gagauzların istoriyasında 1946-1947 yıllarında Sovet rejiminin tarafından gagauzlara karşı zorlan yapılan aaçlık – bu gagauzların en büyük tragediyasıdır, zerä bu aaçlık gagauzların yarısından çoyunu mezarlara soktu.

Akademik Todur ZANETin teklifinnän hem 09.12.2017 günü Avdarma küüyündä toplanan aaçlı geçirän bütün Gagauziyanın insannarın kabulunnan hem da Gagauziya Halk Topluşu deputatlarının Elena KARAMİTin hem Eka-terina JEKOVANın danışmasına görä, Gagauziya Halk Topluşu 2019-cu yılın Canavar ayın (oktäbri) 15-dä aldı karar, ani her yılın Canavar ayın (oktäbri) 19-da Gagauziyada “Aaçlık kurbannarını Anmak Günü” bakılsın. **8-ci sayfa**

Aleksandr STOYANOGLU: “Onnar hepsini ilerdän hazırlamıştılar. Benim arestımı da!”



Canavar ayın (oktäbri) 15-dä Kişinev Apelätiya Palatası, zeetlär içindä edi saat inceleyip Moldovanın gagauz olan Baş prokurorun Aleksandr STOYANOGLUnun serbest brakılması için danışmayı hem Canavar ayın (oktäbri) 8-dä Kişinevun Çokana bölümü sudun tarafından onun bir kabaatsız 30 gün ev tutuklaması altına koyması için alınan kararı, son sonunda Kişinevun Çokana bölümü sudun tarafından alan kararı kuvettä braktı – Aleksandr STOYANOGLU taa ötää dä 30 gün içindä ev tutuklaması altında kaldı.

Kuvettlär tarafından neçin hem nicä hazırlandı hem ömürü geçirildi Aleksandr STOYANOGLUnun tutuklanması hem bununan ilgili açıklamalar, protestlar hem kararlar için okuyun 2-6-ci sayfalarımızda

Aleksandr STOYANOGLU tutuklandıynan: “Bu – memlektin prezidenti tarafından kinnik”

2021-ci yılın Canavar ayın (oktäbri) 5-dä, saat 18:00 için açıklanmış pres-konferençiyannın önündä, Moldovannın informaçiya Slujbasının SİSİ (eski KGB) tarafından Moldovannın gagauz olan Baş prokuroru Aleksandr STOYANOGLU 72 saada tutuklandı.

Bu iş yapıldı bölä ştenariyaya görä:
– Moldova justitiya ministrusu Serdjiu LİTVİNENKO zorlan toplandırdı Moldova Prokurorların Üšek Sovetini;
– Bu sovetä gelän Baş prokuroru Aleksandr STOYANOGLUyu Serdjiu LİTVİNENKO kuudu oradan;
– Sovetin gündelik işinä zorlan konyuldu soruş: “Moldova Parlamenti PAS parçtıyasından deputatın Lilian KARPın Moldovannın Baş prokuroru Aleksandr STOYANOGLUya karşı danışması için”;
– Danışma koyulunca hem kabledilincä, Antikorupçiya prokuroru Viktor FURTUNA Moldovannın Baş prokuroru Aleksandr STOYANOGLUya karşı ceza işi açtı;



– Ceza işi açıldı gibi Moldova justitiya ministrusu Serdjiu LİTVİNENKO hemen bildirdi, ani, zakona görä, bölä iş açıldıktan sora, Moldovannın Baş prokuroru, geçici olarak, işindän alınêr.

– Taa ötää maskalar şousunnan Moldovannın informaçiya Slujbasının SİSİ (eski KGB) ofiterları, gösterici şamatıklan gelip Moldovannın Baş prokuraturası binasına üç saatlik yoklamalar yaptılar, nedän sora, Baş prokuroru Aleksandr STOYANOGLUyu 72 saada tutuklayıp, onu evinä götürdülär, neredä genä yoklama oldu.

Baş prokuror Aleksandr STOYANOGLU prokuraturanın binasından çıkarkana etiştirdi demää jurnalistlerä: “Bu devlet enidän baskıya yakalandı”. Sora da, kendi evinin kapusunun yanında, jurnalistlerin soruşuna “Neçin onu tutukladılar?” Canabisi bölä cuvap verdi: “ Bu – memlektin prezidenti tarafından kinnik”.

Not. Geçti haber, ani Baş prokuror Aleksandr STOYANOGLU eşini dä tutuklamışlar, ama bu saataa ofiçial bir açıklama bu konuda yok.

Sud Aleksandr STOYANOGLUnun tarafını işitmää istämeer hem ona hep köstek koyêr

Moldovannın gagauz olan Baş prokurorun Aleksandr STOYANOGLUnun serbest brakılması için yada kapalı kalması için daava Kişinevün Çokana bölümü sudunda incelendi.

Aleksandr STOYANOGLUya karşı olan prokurorlar istdilär, ki sud onu 30 sutka kapalı braksın. Aleksandr STOYANOGLUnun advokatları hem Moldovaylan Gagauziyanın cümnesi onun serbest brakılmasını istdilär.



Sudun nesoy kararı olacak, vardı nicä annamaa ondan, ani daavacılar Aleksandr STOYANOGLUnun tarafının hiç bir argumentini da işitmää istämedilär hem, ne taa da beter, onnara, Aleksandr STOYANOGLUnun tarafına, köstek ta koydular. Ölä, sud,

Moldova zakonnarını ezeräk, brakmadı Aleksandr STOYANOGLUylan onun advokatu göz-gözä lafetsinnär.

Bundan sora sud kabletmedi Aleksandr STOYANOGLUnun tarafının danışmasını, ani bu sudu Kişinevün bir başka daavacılık bölümümünä geçirmää.

Hep ölä sud kabletmedi Aleksandr

STOYANOGLUnun tarafının danışmasını, ani daavacıların birisini diıştirmää.

Bundan kaarä sud durgutmadı nesoy maskalı eriflerin Aleksandr STOYANOGLUnun tarafına durmayca baskısını.

Bu arada, bu miskin işi başladan eriflerin internet resurslarında hem Facebookta gagauzlara karşı yangını kızıştırmak hem körüklemek yazılar peydalanmaa başladı.

Bekleeriz, Movdova kuvetleri açıcıklar mı gözlerini, osaydı, görmezden gelip, bu cambazlı besleyecekler mi?

Moldova Parlamentının soçialistlar partiyasının deputatları açıkladılar suda, ani isteerlär kendilerinin kişilik garantiyası altına olarak sud Aleksandr STOYANOGLUyu serbest braksın. Ama sud bununnan kayıl olmadı.

Hem taa bir, Kişinevün prokuraturası hem Çokana bölümü sudunun önündä protest mitingları geçtilär, neredä baş losungtu: “Aleksandr STOYANOGLUya serbestlik!”

“Aleksandr STOYANOGLUnun üstünä ataka - bütün Gagauziya insannarı üstünä atakadır!”

07.10.2021 günü Aleksandr STOYANOGLUnun bir kabaatsız tutuklanmasınan ilgili olarak, Komratta onu aralamak hem serbest brakılması için miting oldu.

Mitinga üzdän zeedä insan toplandı. Hepsicii açıktan sölärdilär, ani Baş prokuror kabaatsız tutuklandı hem, ani onu serbest braksınnar. Çoyu çaarardılar “eni kuvetlerä karşı cümne seslämemäk düzeninä geçmää”.

Eni seçilän GHT deputatı Viktor PETROV: “Aleksandr STOYANOGLUnun üstünä ataka – bütün Gagauziya insannarı üstünä atakadır!”

GHT deputatı Grigoriy DÜLGER: “Aleksandr STOYANOGLUnun tutuklanması – bu hepsi gagauzların üzünä tükürmäk!”

GHT deputatı İlya UZUN: “Büünkü Moldova kuvetlerinin yaptıkları Vladimir PLAHOTNÜK zamanında olannara benzeer. Neredä Gagauziya Başkanı? Neçin o, burada, halkın yanında yok?”

Mitingta teklif edildi, ani herliim Aleksandr STOYANOGLU serbest brakılmasa, Komradın baş meydanında binnärlän insan toplamaa hem, läüzüm olursa, mitingları Kişineva geçirmää.

Aleksandr STOYANOGLU: “Bu iş politika karakterini taşıyan bir iştir”

Aleksandr STOYANOGLUnun tutuklanmasından 72,5 saat geçtikän sora, Kişinevün Çokana bölümü sudu karar aldı Moldovannın gagauz olan Baş prokurorunu Aleksandr STOYANOGLUyu 30 gün ev tutuklaması altına koymaa.

Bu karardan sora Moldovannın gagauz olan Baş prokuroru Aleksandr STOYANOGLU dedi: “Yanmış bir karar. Bän bişey kötü yapmadım, bunu da gösterdik işin incelemesindä. İnternet skrinnarından kaarä, prokuratura hiç bir temel belge gösteremedi. Biz gös-

terdik benim kabaatsız olduumu belgileri. Bu iş politika karakterini taşıyan bir iştir. Baskıya yakalanmak durumuna döneriz.

Beni kabaatlı bulêrlar, ani bän 2011-ci yılda ne sa yapmışım, açan halizdän o diıştırmäk Moldovannın

MB tarafından geldi. Hiç bir insan gösterämeyecek, ani benim makar bir ilişkim var Platonnan, angısı cümneyä okadar çok negativ emoçiyalar getirer.

İncelemä işinä karşı bendä bişey yok, ama bän annamêrim, neçin bän, ani iki yılın içindä bukadar enilik getirdim, bunu çekmäm läüzüm? Jurnalistlerä hem cümneyä karşı hiç bir zakaz edilän baskı olmadı”.

Aleksandr STOYANOGLUnun serbest brakılması için Komrada giriş yolun kapanması

Okuyun 6-cı sayfada

Aleksandr STOYANOGLUnun serbest brakılması için mitinglar hem protestlar geçer – Gagauziya başkanı susêr!

Moldovanın eni kuvetleri tarafından 05.10.2021 avşamı Moldovanın gagauz olan Baş prokurorun Aleksandr STOYANOGLUnun bir kabaatsız tutuklanması Moldovayı hem Gagauziyaya sarsıladı hem sarsıladı. Taa o avşam buna karşı olduklarının hem bu tutuklamanın sebepsiz olduunu jurnalistlerä açıkladılar hem juridika argumentlarını getirdilər Moldovanın anılmış hem saygılı advokatları hem prokurorları, diplomatları, devlet adamnarı hem cümne insannarı, ama salt Gagauziya Başkanı İrina VLAH sutu.

Canavar ayın 6-da sabaalendän artık Komratta hem Kişinevda Moldovanın Baş prokurorunu Aleksandr STOYANOGLUyu arkalamak için mitinglar hem protestlar başladılar.

Gagauziya Başkanı İrina VLAH hep sustu!

Gagauziyanın baş kasabasında Komratta miting geçti Gagauziya Başkanının binasının önündä. Bir kaç saatlik mitingta Gagauziyanın patriotları, eski hem eni politikacıları, Halk Topluşun deputatları, Moldovanın zakonnarını önä süreräk, Moldova kuvetlerindän bir kabaatsız tutulan Aleksandr STOYANOGLUnun serbest brakılmasını istedilər.

Gagauziya Başkanı İrina VLAH hep sustu!

Taa sora Gagauziya Halk Topluşun VI-cı hem eni seçilän VII-ci dönem deputatları sıradan dışarı olan maasuz bir toplantı yaptılar, neredä danıştılar Moldovanın eni kuvetleri kabaatsız tutulan Aleksandr STOYANOGLUyu serbest braksınar. Herliim bu iş yapılmarsa Gagauziya eni kuvetlerä karşı seslēmēmäk düzeninä geçecek.

Gagauziya Başkanı İrina VLAH hep sustu!

Moldovanın baş kasabasında Kişinevda da susan olmadı. “Cümne Kongresi” partiyası, Aleksandr STOYANOGLUnun serbest brakılması için, Moldova



Parlamentin önündä, “Huntayı erä!” lozungunu önä çıkararak, protest etti. Bu protesta Moldovanın “Renato Usaty” partiyasından insannar da katıldı.

Gagauziya Başkanı İrina VLAH hep sustu!

Hep o günü Moldova Baş prokurorun yardımcıları Kişinevda bir preskonferenşiyaya yaptılar. Burada Moldova Baş prokurorun yardımcısı Ruslan POPOV argumentlän söledi, ani Aleksandr STOYANOGLUya karşı Moldova Parlamenti PAS parstiyasından deputatın Lilian KARPın yazısı temelsiz bir iştir, çünkü juridika kanonnara dayanmêr.

Bundan kaarä Baş prokurorun yar-

dımcıları üzä çıkardılar Aleksandr STOYANOGLUnun tutuklamanın haliz sebebini. “Bu sebep – dedi Baş prokurorun yardımcısı Ruslan POPOV – Bükü Moldova justitiya ministrusu Serdjiu LİTVİNKONun pek yakın senselesini “Victoriabank” bankasının baş buhgalterini Mariya YOVUyu kapandan kurtarmaa, zerä ona karşı bankalık cambazlında ceza işlerini kapatmaa. Bundan kaarä, Magistratlın Üsek Sovetinin geçici prezidentin Dorel MUSTAŞANın da bu iştä meraklı var, çünkü onun kardaşı da bankalık cambazlına karışık”.

Gagauziya Başkanı İrina VLAH sa hep susêr!



Gagauziya Başkanı, ona deyni kiminsa tarafından Aleksandr STOYANOGLUnun tutuklanması için yazılı olan birkaç lafı ekrandan zar-zor okudu

Moldovanın gagauz olan Baş prokurorun Aleksandr STOYANOGLUnun tutuklanmasından 1,5 gün geçtikten sora, açan Gagauziya hem Moldova bu korkuducu hem dooruluksuz iştan ayaa kalktı, son-sonunda Gagauziya Başkanı İrina VLAH ta, ona deyni kiminsa tarafından yazılı olan birkaç lafı ekrandan zar-zor okumaa deyni kuvet buldu.

Kendi sözünü Canabisi bölä başladı: “Bän danışêrım memleketin politikali öndercilerinä. Bizi raatsız eder Aleksandr STOYANOGLUya karşı yapılan işlar. Taa doorusu bizi raatsız eder rejisörlänmiş spektakli, neredä memleketin politikali kuvedi savaştı zakunun saymasına simuşaşıya yapmaa. Nicä diktaturanın karışıklık vakıdında, birkaç saadın içindä peydalandı ceza işi hem nesoyso belgilär, ani ettilär yoklamaları yapmaa hem Baş prokuroru hem onu eşini tutuklamaa”.

Burada eridir urgulamaa, ani taa ilersi günü Moldova prokuraturası açıkladı, ani Aleksandr STOYANOGLUnun eşi tutuklanmadı, ama



neçin bunu Başkan bilmeer – Allaa biler?

Taa ötää İrina VLAH dedi: “Açıkçasına belli, ani devlet kuruluşları kendi işlerini yaptılar emirä görä, ama diil zakona görä. Taa da açıkçasına belli, Aleksandr STOYANOGLUyu korkutmak isteyişi. Maasuz bu üzerä dä ona hem onun karısına aresti kullandılar. Bu doorudan Aleksandr STOYANOGLUyu bir başkı hem onun aazını kapa-

mak için bir denemä.

Eminim, Canabin Aleksandr STOYANOGLUnun memlekettän kaçmaa hem ceza işi aaraştırmalarından saklanmaa neeti yok. Tam tersinä, eminim, ani o hazır kendi kabaatsızlığını göstermää, ama onu istämeerlär kolvermää dooru daavaya...”

Taa ötää Gagauziya Başkanı başladı nasaat vermää Moldova öndercilerinä, ne yapmaa onunnan, ani Moldovada herbir işä paalar kalkêr da o önderciler läüzim bu işleri çözsünär.

Bundan sora da, Gagauziyanın insannarına danışarak, İrina VLAH dedi, ani “kimi politikacılar savaşêrlar Aleksandr STOYANOGLUnun dolayında durumu kendilerinin politika kazancına kullanmaa”, unudup açıklamaa, ani diil çoktan kendisi o politikacıların yanıydı hem, ani, o politikacılar şüpeli bir yollan, onu Gagauziyada enidän kuvedä gitirdilər, ama Moldovada kuvet diiştinyän kendisi da o saat sattı onnarı.

Foto: facebook.com/vlahmd

Fadey NAGAÇEVSKİY: Stoyanogluyu läüzim diil salt serbest brakmaa, ama, onu iş erinä döndürüp, ona rehabilitaşıya yapmaa



Moldovanın eski justitiya ministrusu Fadey NAGAÇEVSKİY yazdı, ani “Baş prokuroru Aleksandr STOYANOGLUyu läüzim diil salt serbest brakmaa, ama, onu iş erinä döndürüp, ona rehabilitaşıya yapmaa”.

Fadey NAGAÇEVSKİY sayêr, ani bu iş nekadar tez läüzim yapılsın. Bundan kaarä Canabisi yazêr, ani Moldova Prokurorların şindiki Üsek Sovetini läüzim daatmaa da ona enidän isannarı ayırmaa, kırladıp oradan Moldova justitiya ministrusunu hem koyup orayı Moldovanın Baş prokurorunu, Magistratlın Üsek Sovetinin başını hem ombudsmeni (parlament advokatını).

Taa ileri Fadey NAGAÇEVSKİY urguladıydı, ani Aleksandr STOYANOGLUnun daavacılık işi var nicä etişsin Evrupa İnsan Hakları Suduna.

Aleksandr STOYANOGLU: “Onnar hepsini

Canavar ayın (oktäbiri) 15-dä Kişinev Apelätiya Palatası, zeetlär içindä edi saat inceleyp Moldovanın gagauz olan Baş prokurorun Aleksandr STOYANOGLUNun serbest brakılması için danışmayı hem Canavar ayın (oktäbiri) 8-dä Kişinevun Çokana bölümü sudun tarafından onun bir kabaatsız 30 gün ev tutuklaması altına koyması için alınan kararı, son sonunda Kişinevun Çokana bölümü sudun tarafından alan kararı kuvettä braktı – Aleksandr STOYANOGLU taa ötää dä 30 gün içindä ev tutuklaması altında kaldı.



ların tarafından daavacıların diştirilmesini istedikleri incelenärkenä hem daavaların karar almasına gittikleri zaman, Aleksandr STOYANOGLU hem onun адвокаты Vasiliy GAFTON presaya açıklamalar yaptılar.

Moldovanın Baş prokuroru Aleksandr STOYANOGLU açıkladı: “Benim arestimin arkasında durêrlar Moldovanın kesesindän bir miliard dolar çalan benefițiarlar. Büün Moldovada kuvettä bulunan politikacılar da onnarın interesleri için çalışêrlar. Baş prokuror olduundan sora, biz bu bir miliard hırsızlı uurunda incelemelerdä pek çok yaptık. Etiştik taa bankaların çalışannarına, ani hep gölgedä kalardılar. Etiştik çok politikacılar hem onnarın senselelerinä, ani bu işin içindä var. Onuştan son 3 ayın içindä onnar ölä eşinmää başladılar.

Aklınıza getireriz, ani bakmadaan ona, ki Moldovanın hem Gagauziyanın en anılmış prokurorları hem yuristleri Moldovanın gagauz olan Baş prokurorun Aleksandr STOYANOGLUNun tutuklanmsı temelsiz oldu hem bunun politikalı nesteyä kokması söleerlär, Moldovada kuvettä bulunannar bu iştä kendilerini saar hem Ne suvan imiş, ne da suvana kokêrlar gibi yapêrlar.

Nicä dä olsa, bir mikroskopsuz görüner, ani bu iş politikalı cellatluna kokêr.

Daava başladıyan, Moldovanın Baş prokurorun Aleksandr STOYANOGLUNun advokatlari istedilär, ani karar alacak Kişinev Apelätiya Palatasının daavacıları diştirilsin, çünkü onnarın hakkında advokatlarda şüpä var. Bu danışmayı inceleyän Kişinev Apelätiya Palatasının başka daavacıları bu uurda yarı bir karar aldı, diştirip sade bir daavacıyı kayı.

Moldovanın Baş prokuroru Aleksandr STOYANOGLUNun advokat-



Politiya insannarı biri-birinä sokan provokatorları Kişinev Apelätiya Palatasının önündän temizler.

Bakin bitki 3 ayın içindä pravitelstvoya gelän hepsi çinovniklär benim iştan atılmamı istemelerini açıktan söledilär.

Siz gördünüz nesoy alatlan kabledildi o zakon, ani Stoyanogluya karşı sanktiyalar koyulabilisin. Bän sanardım, ani Baş prokurorun çalışmasına nota koyulacak, da bän parlament komisiyasının önündä işi gösterecäm. İnanım, bana var ne göstermää.

Hepsi ne olêr benim dolayımda – bu ceza kabaatıdır. Bän Baş prokurorluk için konkursu geçtim o kurallara görä, ani kurduydu büünkü Moldova Prezidenti Maya SANDU, da ozaman Canabisi onu dooru bulduydu, şindi dä yannış sayêr.

Nicä var nicä olsun ölä, ani bir günün içindä, bir saadın içindä Konstitutiya sudu benim danışmamı inkâr etti, bakmadaan ona, ani bir yıl geeri o danışmanın içindä olan işleri o dooru buldu. Bir saat içindä memleketin prezidenti kendi üç kişisini Prokurorların Üšek Sovetinä (PÜS) koydu, ombudsmeni

bu ceza kabaatıdır. Bän Baş prokurorluk için konkursu geçtim o kurallara görä, ani kurduydu büünkü Moldova Prezidenti Maya SANDU, da ozaman Canabisi onu dooru bulduydu, şindi dä yannış sayêr.

Nicä var nicä olsun ölä, ani bir günün içindä, bir saadın içindä Konstitutiya sudu benim danışmamı inkâr etti, bakmadaan ona, ani bir yıl geeri o danışmanın içindä olan işleri o dooru buldu. Bir saat içindä memleketin prezidenti kendi üç kişisini Prokurorların Üšek Sovetinä (PÜS) koydu, ombudsmeni



Gagauz Todur SAVASTİN annadêr televideniyacılar neçin kendisi hem hepsi bu insannar Aleksandr STOYANOGLUYa arka olmaa deyni burayı toplandılar.



15.10.2021 günü saat 11:36 Baş prokuror Aleksandr STOYANOGLU açêr Kişinev Apelätiya Palatasının kapusunu.

koydu, angısı PÜSün azası da, bir saadın içindä PÜSä taa eni kişilär koydu. Bu cumaa günü oldu. Onnar hepsini ilerdän hazırlamıştılar. Benim arestim da. Ama onnara o günü oy etişmedi. İş pazertesinä kaldı. Pazertesi da hep oy etişmedi. Sade çarşamba günü onnar becerdilär bunu yapmaa”.

Cuvap vereräk soruşa “Siz ne istediniz sölemää presaya o günü, açan sizi tutukladılar?” Moldovanın Baş prokuroru Aleksandr STOYANOGLU bölä cuvap etti: “İstedim açıklamaa onu, ani Prokurorların Üšek Sovetinä 5 kişinin kendi interesleri var, da onnar yok nicä olsunnar o Sovetin azaları. Laf gider Moldova justitiya ministrusu Serdjiu LİTVİ-NENKO için, angısının kayınnası miliard hırsızlı dosyesinde var, Başka bir PÜS azasının kardaşı da dosyelarda var, taa 3 PÜS azası başka işlerä karışık”.

Moldova Baş prokuroru Aleksandr STOYANOGLU başka soruşlara da cuvap verdi, söleyeräk, ani kendisi Baş prokuraturaya geldiktän sora, işi haliz justitiya yoluna koymaa becerdi, kapaayıp bir kabaatsız maasuz açılan politikalı dosyalarını. “Ama, – urguladı

Canabisi, – bu işleri pek zor yapmaa, zerä prokuraturada biri-birinä baalı çok senselä olan insannar var, angılarını zor oldu iştan çıkarmaa”.

Söleyeräk Baş prokuror yardımcısı Ruslan POPOVun tutuklanması için, Moldova Baş prokuroru Aleksandr STOYANOGLU dedi, ani “Ruslan POPOVa karşı zakonu ezmektä ceza kabaatı yapıldı”.

Söleyeräk o prokurorlar için, ani kendisinin tutuklanmasından sora “kendileri” prokuraturadan giderlär, Moldova Baş prokuroru Aleksandr STOYANOGLU dedi: “Prokuraturadan gitmek – bu onnarın kendi kararları. Kim gider prokuraturadan? En islälär, en hazırlanmışlar, namuzlular. Prokuraturada büün 742 prokuror işleer. Onnarın may hepsicci doorucu hem pak insannar. Bän gelincä ne olardı prokuraturada gidin da sorun rayon prokurorlarına, sorun Kişinevdaki prokurorlara”.

Jurnalistlär tarafından koyulan soruşlar kızgınnaştıyan, burada bulunan prokuror Viktor FURTUNA, ani Moldova Baş prokuroruna Aleksandr STOYANOGLUYa karşı uydurma bir



GHT deputatı İvan KARACA Gagauziyadan başka insannarlan Aleksandr STOYANOGLUYa arka olmaa deyni Kişinev Apelätiya Palatasının önündä geldi.

ilerdän hazırlamıştılar. Benim arestımı da!”



Advokat Vasiliy GAFTON argumentlarlan presaya açıklama yapêr.



Aleksandr STOYANOGLU: Bakın bitki 3 ayın içindä pravitelstvoya gelän hepsi çinovniklär benim iştan atılmamı istemelerini açıktan söledilär.



Anılmış hirurg Dr. Aleksandr DANÇ alınacak kara için lafeder.




Baş prokuror Aleksandr STOYANOGLU serbest brakılması için Kışinev Apelätiya Palatasının önündä protest mitingü.

dosye kurdu, sudun sekretarinnän bilä, başladı presayı salondan kuuma. Bundan annadık, ani bu sudta da dooruluk bulunmayacak. Ölä da oldu.

Kışinev Apelätiya Palatasının davacıları ayrı bir erdä aralarında bir saatlik konuşmadan sora, önümüzä çıkıp, hepsinä ilerdän bilinän kararı açıkladılar. İlerdän bilinän, zerä belliydi, ki aralarında bir kıllı güüslü daavacı çıkmayacak, ani yukardan gelän hem yustitiyeya ters gidän emirlerä karşı koyacak.

O günü Kışinev Apelätiya Palatasının önündä, Moldova Baş prokuroru Aleksandr STOYANOGLUNun serbest brakılması için, protest mitingü oldu. Gagauziyadan, Pridnestrovyedän, Moldovanın Kışinev hem Belț kasabasından gelän insannar baardılar: “Stoyanogluya serbestlik!”, ama işidän yoktu, çünkü davacılık sisteminde kendi sıcak erleri için düşünän davacılar, eminnerini basrak, yukardan emirlerä uygun olan karar aldılar.

Todur ZANET, patretlär avtorun



15.10.2021 günü saat 18:46 Baş prokuror Aleksandr STOYANOGLU Apelätiya Palatasının kararından sora: “Ne benim ne karımın bir kabaatı yok!”.



Moldova Baş prokuroru Aleksandr STOYANOGLU hakkında karar alacak daavacıların diştirilmesi için danışmayı inceleyän hem bu uurda yarı karar alan Apelätiya Palatasının daavacıları.



Moldova Baş prokuroru Aleksandr STOYANOGLUNun davasını inceleyän Kışinev Apelätiya Palatasının daavacıları, ayrı bir erdä aralarında bir saatlik konuşmadan sora, hepsinä ilerdän bilinän kararı açıkladılar.

Aleksandr STOYANOGLU'nun serbest bırakılması için Komrada giriş yolun kapanması

Pazar günü, Canavar ayın (oktabri) 10-da, bir kabaatsız tutuklanan Moldovanın gagauz olan Baş prokurorun Aleksandr STOYANOGLU'nun serbest bırakılması için Kişinevda hem Komratta protest mitingleri geçtiler.

İlkin Kişinevda saat 12:00-dä, Moldova Parlamentının önündä komunistler hem soşialistler bloku bir protest mitingini yaptılar, neredä bu blokta Parlament deputatların nasaatlarında Aleksandr STOYANOGLU'nun serbest bırakılması, Moldova öndercilerin zakon kaluplarına dönmesi, paaların bütmesinin durgutması hem cümnenin zorluklarının çözülmesi istendi.

Bundan sora Gagauziyanın baş kasabasının Kultura Binasının önündä Moldovanın gagauz olan Baş proku-

rorun Aleksandr STOYANOGLU'nun serbest bırakılması için taa bir protest mitingini geçti, neredä Gagauziyanın küülerindän hem kasabalarından yaklaşık 300 kişi pay aldı. Onnarın arasında vardılar Gagauziya Halk Topluşun deputatları hem anılmış cümne insanları.

Gagauziya, Moldova hem Evropa Birliin bayrakları altında geçän mitingta nasaat edennär bunnarı urguladılar:

Vladimir KISSA, Gagauziya Halk Topluşun Başı: "Aleksandr STOYA-



NOGLU'nun bir kabaatsız tutuklanmasında kesin görüner politika zakazını izi".

İlya STAMAT, Gagauziyanın içişleri Upravleniyanın eski Başı: "Kuvettä bulunannar azetmeerler Aleksandr STOYANOGLU'nun prinçipli dooruluğundan" hem "Onun erinä isteerler kendi adamını koymaa".

Demyan KARASENİ, eni seçilmiş GHT deputatı: "Bizim mitinglar efekt verdiler. Bilerim, ani Aleksandr STOYANOGLU uurunda karar alan daavacılar, esaba aldılar avtonomiyada yaşayan insanların bu uurda bakışını".

Komratta mitingın sonunda kabledildi karar, neredä merkez kuvetlerindän isteniler Aleksandr STOYANOGLU'nun hemen serbest bırakılması hem Baş prokuror işinä geeri dönmesi.

Bundan sora insanlar, onnarca maşinalara pinip, yollandılar Kişineva dooru. Etiştinyän Gagauziyanın giriş sınırına, onnar saat 17:45-tä onbeş minuda kapadılar Kişinev-Curculeşti yolunu. Bununan yolun iki tarafında da kilometralar uzunluğunda maşinalar kuyruu toplandı.

Patrelär: facebook.com/dpopozoglo, gagauzinfo.md



2023-cü yılda Komrat BDT'nin kultura baş kasabası olacek

2011-ci yıldan beeri Baamsız Devletler Topluluğunda (BDT) kuruldu "Topluluğun kultura baş kasabaları" programası, angısının çerçevesindä 2023-cü yılda Gagauziyanın baş kasabası Komrat BDT'nin kultura baş kasabası olacek.

Bölä karar alındı 2021-ci yılın Canavar ayın (oktabri) 15-dä Baamsız Devletler Topluluğun devlet Başkannarının Sovetinin toplantısında, angısı onlain rejimında geçti.

BDTda "Topluluğun kultura baş kasabaları" programası kuruldu 2010-cu yılın Canavar ayın (oktabri) 4-dä hem 2012-ci yılın Kırım ayın (dekabri) 5-dä Topluluğun devlet Başkannarının Sovetinin tarafından temelä koyuldu.

BDTda "Topluluğun kultura baş kasabaları" oldular:

2011 yıl – Gomel (Belorusiya) hem Ulyanovsk (Rusiya);

2012 yıl – Astana (Kazakistan) hem Marı (Türkmenistan);

2013 yıl – Gabala (Azerbaycan) hem Mogilöv (Belorusiya);

2014 yıl – Almatı (Kazakistan) hem Oş (Kırgızistan);

2015 yıl – Voronej (Rusiya) hem Kuläb (Tacikistan);

2016 yıl – Daşoguz (Türkmenistan);

2017 yıl – Gäncä (Azerbaycan);

2018 yıl – Goris (Armeniya);



2019 yıl – Brest (Belorusiya);

2020 yıl – Şimkent (Kazakistan);

2021 yıl – Duşanbe (Tacikistan);

2022 yıl – Karakol (Kırgızistan);

2023 yıl – Komrat (Moldova, Gagauziya).



Köşä ardında poliñiyaylan buluşmaya hazır olun!

Moldovanın Cümne saalında Üstolan Durumu milli komisiyası (CSÜDK) aldı Karar, ani Canavar ayın (oktabri) 15-dän beeri sokakta bulunan insanların yanında her zaman lääzım olsun pasport.

Bu iş, şaka murat maamilä surat, COVID-19 hastalımı ensemää yardım edeymiş. Herliim poliñiya vatandaşları pasportsuz yakalarsa, ozaman "COVID-19 durgutmaa deyni" – para cezası!

Bezbelli devlettä işler (diil COVID-19 işleri, makar o da çok kötü, ama buceci para işleri!) pek prost durumda da o paraları vatandaşlardan, tulum gibi şiş bükratların beslemesi için, toplamaa lääzım. Çünkü onnar aç kalırsa – ozaman kuvettä bulunannarı aktaralar.

VATANDAŞLAR, DİKKAT! Evdän ekmek için, aptekaya, pancera, sokak tarafından aul boyunda dernä, uşak başçasından uşaa almaa deyni, düünä, kliseyä gitmää yada başka bir sokak zorunuz için evinizdän çıkarsanız, köşä ardında poliñiyaylan buluşmaya hazır olun!

TİKA Başkan yardımcısı Dr. Mahmut ÇEVİKLän gagauz proektları lafedildi

Canavar ayn (oktäbri) 20-dä Türk İşbirlii hem Koordinaşıya Agenstvosu (TİKA) Başkan yardımcısı Dr. Mahmut ÇEVİK kabul etti Ukrayna Gagauzlar Birliin başkanı Vasiliy KELİOĞLU-yu hem Türkiye Ankara “Gagauzlar” dernään başkanını İrina ÜSÜMBEYLİyi.



Nicä bildirdi TİKA Başkan yardımcısı Dr. Mahmut ÇEVİK, buluşmak zamanında Ukrayna hem Moldova gagauzlarına cümne, kultura hem başka uurlarda TİKA tarafından yapılacak hem yapılması lâazım olan proektların kolaylıkları lafedildi.

Kendi tarafından Vasiliy KELİOĞLU hem İrina ÜSÜMBEYLİ şükür ettilär TİKAYA hem TİKA Başkan yardımcısına Dr. Mahmut ÇEVİKä gagauzlara yapılan yardımnar hem ashyä çıkarılan proektlar için.

Bosniya-Gerţogovina devletinä TİKAdan taa iki proekt

Hepimiz bileriz, ani Türk İşbirlii hem Koordinaşıya Agenstvosu (TİKA) bütün dünnäädä binnärlän yardım proektları yapêr. Geçennerdä proektların ikisi başardı Balkannarın Bosniya-Gerţogovina devletindä, angıların ofițial açılışında pay aldı TİKA Başkan yardımcısı Dr. Mahmut ÇEVİK.

Proektların birincisi – Bosniya-Gerţogovina devletinin başkasabasında bulunan Saraybosna Üniversitetin çiftçilik çorbacılı fakultetinde Amfiteatrunun enilenmesi. İkincisi da – Zenica kasabasının kapalı tip olan kapanında dikiş atelyesinin kurulması.

Amfiteatrunun açılış sırasında pay alan TİKA Başkan yardımcısı Dr. Mahmut ÇEVİK urguladı: “1995 yılından başlayıp TİKA Bosniya-Gerţogovina bindän zeedä proektını ömürä geçirdi. Onnarın arasında çiftçilik alanında üzlärä yapılan proekt var.



Bosniya-Gerţogovina 1992-1995 yıllarında yaşanan cengin acılarını dindirmäk hem bölgedä yaşayan halkın ömür standardını üseltmek için hem da göçü durgutmak sebeppnän uygulanan proektların binnärä boşnak, topraklarını brakmayarak, küülerindä yaşamaya başladı”.

Bosniya-Gerţogovina devletinin Zenica kasabasının kapalı tip olan kapanında 100 kişi çalışabilecek dikiş atelyenin açılışında sa Dr. Mahmut ÇEVİK açıklamasında TİKAYı bölä annattı: “TİKAnın 60 memlekettä 62 ofisin çalışmalarınan yılda 2000 hem son 19 yılda 30 bindän zeedä proekt ashyä çıkarıldı”.



Moldova Rusiyaylan gaz oyuncaa oynêr, insannar sa tezeklän yısınmaya geçerlä

Kışa karşı Moldova hem Rusiya arasında gaz dartışmalrı var nicä getirsin ona, ani bu yıl bütünnä Moldova tezä geçecek. Politika beterinä Moldova kuvetleri kış başında başladılar Rusiyaylan gaz oyuncaa oynamaa. Da bu oyunnan insannarı yısınmak için odunnan kömür almaya hem tezek aaramaya soktular.

Ani Moldovanın kimi küülerindä XXI-ci asirdä dä tezeklän yakmaktan vazgeçmedilär biz bilärdik, ama, ani bütün Moldova tezek aaramaa başlayacak – bunu biricii beklemäzdi. Tezä sa kimsey samtêr. Bu arada odunnan kömür paaları da yukarı fırladılar. Bu durumda Moldova kuvetleri Rusiyaylan gaz oyuncaa oynamaktan hep vazgeçmeerlä.

Gaz kıtlı sa açlık kıtlına dönmä başladı. Ekmek hem başka iyecek malların paaları patladılar. Elektrika, gaz, benzin hem solärka paalaarı durmayca büüylerlä.

Gaz kıtlı beterinä AB “Moldovagaz” kompaniyası gaz ekonomiyasına çaarêr.



Gaz kıtlı beterinä büyük fabrikalar hem yısıdıçı çentralları mazut yakıtına geçtilär.

Devlet kuvetleri, Üstolan durumunu uydurup, devlet yakıt rezervalarını açtırdılar da oralarını boşaldêrlar.

Büet rezervasından da 15 miliard ley para alıp, onnar, kendi gazı olmayan Polşa aracı firmasından, bir bakırcık gaz satın aldılar – 1 milon kub! Moldova sa gündä 15 -20 milion kub arası gaz kullanêr. O gazın da paasını saklı tutêrlar. Sansın parayı kendi ceplerindän ödärmişlär gibi.

Şindi taa nesoysa aracı firmasından taa birbuçuk bakırcık gaz bulmuşlar – 1,5 milon kub. Hep ölä saklı paaya.

Bu bakırcıkların hem saklı paaların ardında sanki ne var? Açaba tunuk suda balık tutması mı osa başka iş mi?

Nicä dä olsa, kimin sa harşaklı beterinä, Moldovada gaz işi gölü kaşıkkan doldurma işinä döndü.

Todur ZANET

“Vatandaşları korumak için” gaz uurunda Üstolan durum koyuldu

Canavar ayn (oktäbri) 13-dä Moldovanın Üstolan Durumu uurunda milli komisiyası aldı Karar, ani Moldovada tabiat gazı bölümü uurunda Üstolan durumu koymaa.

Karar alındıktan sora Moldovanın viçe-premyer-ministrusu, infrastrukture hem regionnar ilerlemesi işlerindä ministru Andrey SPINU dedi: “Biz, tabiat gazı bölümü uurunda Moldovada Üstolan durumunu açıklêrız, ani türlü şenariyalara hazır olalım deyni.

Hazır olmak durumu demeli, ki vatandaşları korumak için kuruluşlar konkret ölçüleri var nicä alsınar”.

Ministrunun açıklamasına görä, ilk adımda, kuvetlär vatandaşlara yardım karşılaması süstemasını düzenneyecekler hem fondları kuracaklar.



Çeşmä küüyündä 1946-1947 yıllarda Aaçlık kurbannarını anmak sırası

Canavar ayın (oktäbri) 19-da, Gagauziyanın “Aaçlık kurbannarını Anmak Günündä”, Çeşmä küüyün primariyasının çalısmasınan, bu küüyün 1946-1947 yıllarda Aaçlık kurbannarını Anmak Memorialında bu kurbannarı anmak sırası oldu.

Anmak sıranın başında, küü lıeyinin gagauz dilindä hem literaturasında ürediciykanın Elena Nikolaevna KÖSÄnin zaametinnän, üreñcilär, ellerindä aaçlıkta diri kalan dedelerinin patretlerini tutarak, okudular onnarın 1946-1947 yıllarda zorlan yapılan aaçlık için annatmalarını.



Bu aar hem yaşlı gündä söz tutan Çeşmä küüyün primarı Sofiya JEKOVA şükür etti küülülerä hem o insannara, angılarının yardımınan hem parasınan kuruldu bu Anmak memorialı, ani verer kolayımı daymalarda anmaa aaçlaa kurban olan insannarı. Neyi, yaşlarlan gözlerindä, bir susmak hem saygı minudunnan yaptılar hepsi o insannar, ani toplandıydılar bu yaşlı sıraya.

Anmak sırasında kendi duygularınan çeşmäküülülerin önündä nasaat ettilär Çeşmä küüyündän Gagauziya Halk Topluşun VI-cı toplumun deputatı Ekaterina JEKOVA hem yazıcı Konstantin KURDOGLU.

Bu memorialda toplu mezarda gömülän 1946-1947 yıllarda aaçlaa kurban olan bir bindän zeedä kişinin cannarı için küüyün Bük Panaiya klisesinin popazı Ay-Boba Văceslav slujba yaptı hem koliva kaldırdı.

Slujbadan sora, 1946-1947 yıllarda Aaçlık kurbannarını anmak için toplanan insannar



Anmak memorialına saygıylan çiçek koydular.

Not. 1946-1947 yıllarda gagauzlara karşı zorlan yapılan aaçlıkta gagauz küülerindä 40-60% insan bu aaçlaa kurban oldu.

Patretlär: cesma.md, Natalya Boeva

1946-1947 yıllarda Aaçlık – milletimizin tragediyası

1946-1947 yıllarda Aaçlaa binnän can kurban verän Kıpçak küüyü Canavar ayın (oktäbri) 19-da andı o bir kabaatsız aaçlaa kurban olan insannarı.



Bu yaşlı gündä anmak masası başında toplandıılar insannar, ani geçirdilər o tragediyayı, küüyün popazı, üredicilär hem üreñcilär. Anmak sırasında, kıpçaklıların Panteley Vasilyeviç YANULOVun hem Harlampiy Avramoviç KOLİOGLUnun 1946-1947 yıllarda Aaçlık için annatmaları hiç birini raatsız brakmadı. O aar hem kara günnär için aslısı sesleyenlerin gözlerini yaşlan hem cannarını sancıylan doldurdu.

Hepsicii kayıl oldular onunnan, ani 1946-1947 yıllarda Aaçlık – milletimizin tragediyası hem o tragediyayı diil läüzim unutmamaa.



Avdarma küüyündä 2018-dän beeri Aaçlık kurbannarını ofițial anêrlar

Hepsimiz bileriz, ani 2019-cu yıldan beeri Canavar ayın (oktäbri) 19-zu Gagauziyada, ofițial olarak, “Aaçlık kurbannarını Anmak Günü” oldu, ama bu işi Gagauziya Halk Topluşu tarafından, taa ilktän, 018-ci yılda teklif edildiinnän, kabletmeyincä, Avdarma küüyün primariyası 2018-ci yılda karar aldı Canavar ayın (oktäbri) 19-da “1946-1947 yıllarda Aaçlık kurbannarını Anmak Günü”nü bakmaa.



Avdarmada bu yıl 1946-1947 yıllarda Aaçlık kurbannarını Anmak sırası yapıldı küüyün mezarlında kurulan “Avdarmada 1941-1945 yıllarında tiftan ölä 575 kişiyi hem 1946-1947 yılında aaçlıktan ölä 583 kişiyi anmaa deyni” Çasovnänin yanında, angısı düzüldü Avdarma küüyün meçenatlarının parasınan hem açıldı 2019-cu yılın Canavar ayın (oktäbri) 19-da, Gagauziyada “Aaçlık kurbannarını Anmak Günü”n seftä ofițial bakmak günündä.

Aaçlık kurbannarını anmasında pay aldılar küüyün Primarı Marina KAPSAMUN, Avdarma küüyündän Gagauziya Halk Topluşun VI-cı toplumun deputatı hem küüyün istoriyası muzeyin direktoru Elena KARAMİT, muzeyin zaametçileri, küü lıeyin üredicileri hem üreñcileri.

Hepsi bu insannar, aaçlık kurbannarını anarak, Çasovnenin anmak taşına çiçeklerini koydular, mumnarrını yaktılar hem aaçlıktan bir kabaatsız raametli olan cannar için dua ettilär. Küüyün Ay-Mihayıl klisesinin popazı Ay-Boba Konstantin raametlilerin cannarı için liturgiya okudu.

Bilinän bilgilerä görä Avdarma küüyündä 1946-1947 yılında aaçlıktan 800 kişidän zeedä insan öldü, onnarın salt 583-çün adı hem laabı bulundu. Kalanını taa araştırêrlar.

Not. Gagauziyada “Aaçlık kurbannarını Anmak Günü” bakılsın deyni karar alındı Gagauziya Halk Topluşu deputatlarının Elena KARAMİTin hem Ekaterina JEKOVAın GHTya danışmasına görä, angısı için Gagauziya Halk Topluşu el kaldırdı 2019-cu yılın Canavar ayın (oktäbri) 15-dä.



“ANA SÖZÜ” Gagauz dilindä gazeta
Çıkêr 14.08.1988 beeri

Kurucu “ANA SÖZÜ” S.R.L.
Sertifikat No. 1003600086420

Todur ZANET
Baş redaktor

İndeksi - PM – 21358

Gazeta “Universul” basım evindä basilêr
Tiraj – 3020 ekz. Sımarlamak No: 711

YAZIŞMA ADRESİMİZ:
RM – 2028, Moldova, Kişinêu,
c/p Nr. 1025. Tel/fax: 022 28-18-04

e-mail: todur.zanet@gmail.com
zanet@anasozu.com